

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Muir. A. Azim (atba)

14 Février 2020

19 Jamadi'ul Aakhir 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

La Conception de Dieu dans L'Islam

L'islam content contempler bane attributs d'Allah à travers So bane différents noms ki bien adorables et ki dimounes invoque Li. Quran Shareef dire : « **À Allah appartenir bane noms ki pli jolis ; alors appelle Li donc par sa bane noms là.** » (Al-Arraf 7 : 181).

Ena ene traalé littératures théologique ki exister pour explique et pour classifier So bane noms. Nous cause souvent de quatre-vingt-dix-neuf (99) noms d'Allah, mais sa bane noms là zot appelé différamment par plusieurs bane différents écrivains de sorte ki ena des centaines de noms ki nous capave attribuer à Allah parski Allah possède n'importe ki qualité par quoi nous ouler adore Li. Alors ki nous, bane humains, nous limité, Allah quant à Li, Li infini. Alors ki nous pas ena la faculté pou penser dans ene forme complète, mais seulement en partie, Allah quant à Li, Li en Li-même complet et Li comprend bocou plisse ki nous capave imaginer. Nous pense lors So pitié, So l'amour, So sagesse, So gloire et So majesté, So justice, So vérité et So droiture, So l'unicité, etc., mais kan nous faire sa, nous l'esprits limités parski nous connaissance li limité tandis ki Allah Li conne tout, Li comprend tout, Li entende tout et Li dépasse tout. Nannié pas égal à Li. Nous

pense toujours en bane termes relatifs tels ki le premier et le dernier; le visible et l'invisible. Mais avec Allah, sa bane qualités opposés là li rencontrer et nous donne sa bane mêmes paires de noms là à Allah, c'est-à-dire, Le Premier et Le Dernier, Le Visible et L'Invisible. Pour nous, la contemplation de l'éternité implique ki nous rejette deux limites; c'est-à-dire, le commencement et la fin. Allah tousel Li éternel et Li péna ni commencement et ni la fin. Nous pense à Allah en relation avec le temps et l'espace: mais le temps et l'espace zot bane créations de nous l'esprit. Allah Li Indépendant du temps et de l'espace. En réalité, Allah Li l'Absolu, Li Indépendant et tout kitchose dépanne de Li.

Nous pense généralement ki l'emphase de l'islam li trouve lors l'unicité d'Allah, mais nous bizin aussi dire ki l'emphase li également lors So pitié, So bonté et So l'amour. Le Quran Shareef contenir 114 Surahs et tous sa bane chapitres là, à l'exception d'ene sel chapitre commence par « *Au nom d'Allah, Le Très Gracieux, Le Très Miséricordieux.* »

Bane attributs d'Allah : '*Rahman*' et '*Rahim*' zot bane noms ki pas ena aucune équivalence dans n'importe ki l'autre langue et pas capave de ce fait traduire zot à proprement parlé. '*Rahim*' mette l'emphase lors la pitié ki nous rechercher d'Allah, et ki Allah pas pou refuser pou donne nous.

« ***Bismillah-ir-Rahman-ir-Rahim*** » c'est phrase ki ene musulman prononcer le plus souvent: au commencement de la prière (ki li *Salat* et *duahs*), avant lire le Quran Shareef, avant manger, avant voyager, avant commence n'importe ki kitchose d'ene certaine conséquence – ki li sacrée ou séculaire (c'est-à-dire, ki li concerne la spiritualité et bane zaffaires de sa le monde là).

Ainsi bane actions d'ene musulman zot intimement lié avec sa bane mots sacrés là. L'insistance lors l'unicité d'Allah li pas seulement ene protestation contre la Trinité ou la Dualité ou le Polythéisme [c'est-à-dire, ki li 2 ou 3 ou plizirs fausses dieux]. L'islam croire ki Allah Li ene sel, unique et sans égal. Ene jeune étudiant de la religion fine ene jour définir Dieu comme étant tous bane qualités abstraits de la bonté et de beauté ki combiné en ene seule abstraction. Certains capave accepter sa définition là, mais pour l'islam c'est ene abstraction ki froide et sans valeur. La vie li toujours ene mystère que ce soit pour la science, l'art, la poésie et pour la religion. Anou guetter saki le Quran Shareef dire: « **Dire: Li, Allah, Li Unique, Li Absolu. Li pas fine donne naissance personne [Li pas fine engendré**

personne], et personne pas fine donne Li naissance. Et personne pas égal à Li. »
(Al-Ikhlaas Chapitre 112)

Tout l'univers en entier li ene création [ene création d'Allah]. Mais toutefois l'homme ena ene position spéciale parski li le représentant d'Allah lors la terre : « **Khalifa** » (Al-Baqara 2: 31). La nature spirituelle de l'homme li ene bénédiction d'Allah et alors l'homme li au-dessus de bane barrières de race ou de langage ou de n'importe ki les autres différences et alors la fraternité de l'islam vine ene concept pratique, ene tel concept ki ti recommandé par le Saint Prophète (saws).

Dans bane versets sublimes du Quran Shareef (Al-Baqara 2 : 256) la majesté et la grandeur de bane attributs d'Allah fine référé comme suite: « **Allah, pas ena d'autre bondié à part Li. Li vivant, Li éternel. Ni assoupissement, ni sommeil affecter Li. Pou Li appartenir tout séki lors bane les ciels et la terre. Ki sanlà ki pou capave intercède auprès de Li sans So permission ? Li conne zot présent et zot future, mais zot pas capave saisi nannié de So connaissance, excepter séki Li oulé. So trône étende lors bane les ciels et la terre et So surveillance lors sa deux kitchoses là pas fatigue Li. Li même Le Plus Haut, Le Plus Grand. »** (Al-Baqara 2 : 256)

Allah Li éternel et non pas ene abstraction. Li indépendant tandis ki toute la création dépanne de Li. Alors ki tous bane kitchoses pou fini ene jour et pou disparaite, Li tousel pou reste éternel. Li pas bizin ni Li gagne kit repos ou sommeil, parski Li en Li-même Li l'existence et Li absolu.

L'homme capave prend bane avocats et bane intercesseurs dans sa le monde ici-bas là pour défanne li, mais ki sanlà assez grand et vainqueur pou vini devant Allah sans So pitié et So pardon ? [Personne !!!]

Aucaine intercession ni avocat pas nécessaire parski So connaissance surpasse tout. Le concept du temps et de l'espace zot applicables pour So bane créatures et pas pour Li. Li partout en même temps et quoique tout l'univers dépanne de Li, mais sa pas demande li aucaine zeffort ou la peine pou occupe li de tout sa là. Si nous pense lors la majesté en terme de l'espace, Allah [So Majesté] Li pli haute ki sa.

D'après nous bane conceptions de la moralité, nous pense à Allah comme étant Le Bon (*Barr*), La Vérité (*Haqq*), Le Généreux (*Karim*) - l'opposé de ene kikaine ki avare. La bonté pas capave être mesuré par bane qualités relatives ou en référant à ene dimoune ou à ene bénéfice ki fine accumuler lors celui ki faire le bien. C'est la bonté absolue, ki mesuré par bane bénéfices permanent ki versé lors bane ki destiner pou gagne sa bane bienfaits divines là d'après le grand plan d'Allah. La vérité dans nous la vie li pas seulement la probabilité, ou pou rode bane preuves et le fait pou trouve kitchose d'après nous bane concepts de la vérité. La vérité d'Allah li absolue. Li pas dépanne d'aucaine preuve ni de la probabilité. C'est la réalité absolue, et Allah tousel mérite sa nom là (*Al-Haqq*).

La paix li spirituellement associée avec l'islam, car la conception de base de la vie sociale et individuelle repose lors là [lors la paix]. Le premier salutation ki bane « bienheureux » pou recevoir dans paradis pou « *Salaam* » (paix). L'islam li ene religion de paix ; pas ene la paix extérieure, parski li capave rentre en conflit avec le mal à l'extérieur, mais li ene la paix interne, la paix dans l'âme kot tous bane inconsistances enlever et kot la peine, le chagrin et la déception disparaite.

Le seul support ferme et inchangeable c'est nous l'espoir eternal dans Allah. So bonté li sans limite. So bonté dépasse nous bane besoins. Bien souvent nous ouler bane kitchoses ki nuisibles pour nous-mêmes et nous pas conscients de bane kitchoses ki nous nature spirituelle réclamer. La bonté d'Allah vini par li-même, sans ki nous demande Allah, et kan li vini, li vine en abondance. Quran Shareef dire: « **C'est Li Allah. Pas ena ene l'autre bondié aparte Li. Li le Roi, le Saint, le Salut, Qui donne sécurité, le Protecteur, le Puissant, le Très Fort et le Très Grand. Gloire à Li ! Li bien loin de bane associés ki zot donne Li là ! C'est Li Allah, le Créateur, Qui produire, Qui donne forme. Li ena les plus jolis noms. Tout dans bane les ciels et la terre faire So louanges. C'est Li le Puissant, le Sage.** » (Al-Hashr 59 : 24-25).

Allah – Tous bane noms magnifiques appartenir à Li. Li nous Protecteur et nous L'Espoir. Comme So bane attributs zot vastes, et éternels, li difficile pour kikaine pou cerne tous sa bane qualités infinies là, mais *Insha-Allah*, par So guidance, mo pou faire ene humble zeffort pou explique zot tout sa dans mo bane *Khutbas* prochains. Ki Allah donne moi la grâce et la faculté pou faire li afin ki zot, So bane serviteurs capave comprend So bane attributs et approche Li à travers le souvenir de So bane attributs. *Insha-Allah, Ameen.*